

VOL - III ISSUE 1



THE

BEST OF
**MOVIE
MUSICALS**

ZAMTEI NEN
MOVIE
AND
CHILL

Cruising



MAKE-UP
TIPS & TRICKS

FILM
EDUCATION



**ARTSY
BIT**

REVIEWS

BROUGHT TO YOU BY

LMS MART

LMS MART



LMS Mart

Canteen Square, Dawrpui

Phone : 0389-2325447

contents

- 4 FROM THE EDITOR'S DESK
M. RALTE
- 5 FILM EDUCATION
DIDINI TOCHHAWNG
- 6 MC PEOPLE :
ARTSY BIT
MAWIA CHAWNGTHU
- 8 THI
M. RALTE
- 10 MOVIE REVIEW
STANLEY
- 12 Q&A WITH OUR CG
- 16 SIAMSIAMI DESIGN STUDIO
- 17 MC MAKEUP TIPS & TRICKS
ANDREA
- 18 2010 HNU LAMA HOLLYWOOD
MOVIE MUSICALS EN TLAK ZUAL TE
OMOMA RALTE
- 20 ZAMTEI NEN MOVIE AND CHILL
ABLE AWMTEA
- 22 CUISINE
STANLEY
- 23 LOVE GURU

MOVIE CORNER MAGAZINE

moviecornermagazine.com

EDITORIAL

Editor-in-Chief: m. ralte

Deputy Editor: mazirtira

Editor-At-Large: didini tochhawng

Associate Editors : mawia chawngthu
stanley
omoma ralte

Art Directors: ruati hrahsel
muantea chinzah
awmtea

Cartoonist: Hriatpuia Cc

Photographer: andrew lalbiaknunga ralte

2017

From the Editor's desk

-m. ralte

Hello Movie Corner Magazine Fans!

Kan lo dam tlang hlawm em? Siamtu zarah keini pawh kan dam tlang, kan lawm e. Kan inhmuh lohna a va rei ta em. In ngaihawm thin hle mai.

Kum eng emaw chen chu Editorial Board lam te kan buai phili em em a. *“Eng tik hunah tak lo let leh thei ang maw!?”* kan intih rilruk reng lain, hei, kan lo lang leh thei ta hlawl mai a. Kan lawm tak zet zet a ni. Khuana’n min hualhim se, thlatin kan intihlim tlang thei zel turah ngai phawt ang.

Tun tum Editorial Board kan insiam rem chungchangah U Manuna Hj of kan Daktawr hian, *“Ka hul ru ta riau mai. Ka lerh a chhuak ta lo. Nupui ka nei dawn. Ka awl duh tawh. Daktawr ka nih hi,”* a tih tlat avangin, a inlak C.E.O.-na chu ma thei loa pawmsak a ngai ta a. Kan va han ngai dawn tak em. Movie Corner Group din tirh atanga, tun thlenga a hnathawh ropui tak tak te hi, chhuan tlak leh umphak chi rual a nih lohzia hi phek tam tak ziah tur a awm ang (*A la rawn zia dawn Chiang alawm*). A hul loh hun leh khiangawipui tur a neih huna **‘Hups! Sa Free’** pawh kan nghakhlel tak zet!

Tun tuma kan Cover Girl, Andrea, hi lo chik chet chet mah teh u. En mai aiin a thinlung hi belhchian a chakawm asin! Designer kawm nuam leh rin tlak, Siamsiami kut chhuak a rawn inbel te hi kan va han chhuang tak em! Artsy Bit hming hi i hre tawh ngai em? An kuthnu te a mawi dangdai asin. Tun tum zet zawng chhiartute mit leh hriatna titlai tur kan va han ngah tak em. Love Guru kha kan la hre reng em? Chhiar chhuak dap ila, comment leh luai luai ang u aw.


Lastly but not the least, CG Cover shoot kan neih tuma min rawn tawiamtute zawng zawng chungah khan LAWMTU of the BESTEST kan sawi e. In fel, in hmelfha. Kan lawm tak zet zet e. Ciao!



Film Education



Photography, videography/filmmaking leh fine art lama tui te chuan Camera Obscura tih tawngkam hi kan hre fo tawh thin awm e. Hmanlai mithiamte khan he hmanrua ho te anga lang an lo hmuhchhuah avanga tuna kan camera hman leh hmuh theih te hi lo piang chhuak an ni. *(Hei hian camera chi hrang hrang, video tiamin, kan phone camera thlengin a huam tel vek a ni).* A tawi zawngin han sawi ta ila, Camera Obscura chu bawm emaw pindan thima eng luh theihna kaw pakhat, pin-a verh kuak (*pinhole*) emaw convex lens emaw hmanga eng luh theihna kua siam a ni a. Heta tanga eng lo lut hian bawm emaw pindan thim emaw chhunga bangah chuan pawn lam thla chu a letling zawngin a kap lang thin a ni.



Camera Obscura hnathawh dan hi mithiam hrang hrangin an lo tarlang tawh thin a. Tuna a hming hi mithiam tam takin an zir chian hnuah kum 1604 A.D khan German astronomer, Johannes Kepler chuan **Camera Obscura** tih tawngkam hi a phuahchhuak ta a ni. Hriat theih chinah chuan Chinese mithiam, Mozi chuan 400 B.C bawr vel khan a lo sawi tawh a. Hei hi a hmasa ber anga ngaih a ni. Tin, Greek mithiam Aristotle pawh khan 350 B.C vel khan a lo sawi lang tawh bawk a ni. Anni mai bakah hian mithiam hrang

hrangin hemi chungchang hi an lo zir chiang tawh thin a. Chu'ng mithiam zinga khawvelin a hriat lar tak ber chu Arab mi, Alhazen (Ibn al-Haytham) hi a ni. Ani hian kum 1012 - 1021 A.D bawr vel khan Camera Obscura chungchang hi a lehkhahu 'Book of Optics'-ah a tarlang tawh a ni. He lehkhahu hi tawng dangtea lehlin niin, Europe lama mithiamte zir chian a hlawn em em a. Lem ziaik thiam tam takin an tangaipui em em a, kan hriat lar zinga he hmanraw hman tangaik ber pawl chu Leonardo Da Vinci hi a ni.

Kum 1600 bawr vel khan Camera Obscura hian hriat a hlawn zual hle a. Lem ziaikthiam tam takin an lemziah tanpuitu atan an hman nasa hle a ni. Amaherawhchu, camera obscura-ina thla a lak hi a dah that theih loh a, eng rawn kap luttu a awm loh chuan a bo nghal mai zel a. Chutia thlalakna hmanrua a awm takah chuan mithiamte'n a vawn that theihna tur hmanrua siam tumin an bei nasa a. Kum 1826/1827 khan Joseph Nicephore Niepce chuan khawvela thlalakna hmasa ber chu a siam chhuak thei ta a ni. Hemi hnu rei lo teah thlalakna hmanrua tha tak tak siam chhuah zel niin, motion picture (*film/video*) pawh a lo pian chhuah theih phah ta a ni.



“Your Personality in Art Form”

MC People

ARTSY BIT




May ni 22, 2017 tlai khan thian pahnihin, Zarkawta hangout lar tak Felafels-ah coffee in pahin an thiam thil ve ve hmanga brand thar siam an rawt chhuak a. Art leh business kaikawpin ‘ARTSY BIT’ a lo piang ta a ni. Hemi brand siamtu, Ruata leh Ruatkimi te hian Ruatkimi project pakhat, PUC a wall painting a tih, social media lama viral zui ta vak aṭanga hetiang ngaihtuahna hi rawn nei an ni a. An brand hi darh zau thei tur ang berin social media platform hrang hrang an hmang zui nghal a. Artsy Bit hi thla thum leka upa ni mah se dawrtu leh hretu an tam tawh hle a ni.

-mawia chawngthu



Artsy Bit chu eng nge ni?

'REPERSONALIZE YOUR PERSONALITY' tih tagline hmangin Artsy Bit hian thawmhaw an chei thin a. Tun atan chuan denim jacket leh canvas shoes lamah an insawrbing rih a, an len chhoh dan azirin thil dang pawh tihbelh an tum zel a ni. Anmahni dawrtute hi zaa sawm riat (80%) chu hmeichhia an ni a; kum 13 – 24 inkar thalai an ni tlangpui baw a ni.



Artsy Bit chu tu te nge an nih?

Artsy Bit hian tunah hian Manager pahni leh Artist pathum an nei mek a. 'Ruata' hian B.Com zir zo tawhin, an business leh promotional hna a enkawl a. 'Ruatkimi Jongte' hi BA zirlai niin, managing bakah art lam a khawih tel baw a ni. Artist pathum an neih te hi 'Awmpuii', 'Siamtea' leh 'Dido Khiangte' te an ni. Anni bakah hian artist dang te pawh an la zawn belh zel a. Painting style hrang theuh an nei a, customer-te duhdan azirin artist hrang hrang te hi project pek thin an ni. Artsy Bit project bakah hian a mimalin project an nei hrang theuh baw a ni.

hrang hrang te pholan an la tum a. Mizoram mai ni loin, India leh ram pawn lamah te pawh an project te hi thawn chhuah an tum baw a ni. An project pakhat hi Amsterdam-ah an thawn tawh a, Phillipines leh London lamah pawh an project te hi thawn turin hma an la mek a ni.

Artsy Bit te hian an thiamthil hmangin brand thar tha tak an siam chhuak a. Hei hian Mizo thalaite kan duai bik lohzia a tilang chiang hle. An hmalam hun pawh a eng viau a ni. Movie Corner Magazine chuan Artsy Bit hmalam hun zel atan duhsakna sang ber kan hlan e. An kutchhuak te en duh tan Facebook leh Instagram ah 'ARTSY BIT' tihin a zawn theih a, an page atang hian order pawh a siam theih nghal a ni.



Artsy Bit hmalam hun atan eng nge kan beisei theih?

Brand ding thar chauh an nih angin Artsy Bit te hian penetrative pricing an hmang a, tlawm takin an project hi an la ti rih a ni. Hming chher phawt a, an lar hnua brand lian anga insiam hi an tum ber a ni. Sponsorship te zawngin mi hrang hrang an be kual tawh a, chu'ng zingah chuan make-up artist lar tak 'Taboiha' pawh a tel a ni. Aizawla fair leh event awm thinah te stall siam a, an project



THI

-m. ralte



Bernard Stubbs-a chu naupang dang a ang ve lo a. A lu a lian em em a, a taksa erawh a sawngnawi hle a, a ke pakhat a bai bawh a ni. Tawng khat hle e ti lo chuan a tawng ve chhunin a lei a tawt bakah, a dang a awk bawh a. A hmel ai mahin a nungchang a duhawm lo zawk a. A nunrawngin, a thinchhe em em bawh a. Ngainatawmna pakhat te mah a nei lo a ni ber e.

A chhungte'n a tan theih tawp an chhuah nachungin harsa tih chang an ngah hle a. Khawtlang hna thawktute'n 'a bika enkawl a tha' tiin thurawn pe thin mah se, a nu chuan 'a chhungte tling lo hle mah ila, eng ang pawha thiamna sang midang daih enkawl na hnuai a dah ai chuan' tih tan chhanin anmahni enkawl a thlang zawk tlat zel a. Ngaih ngam lo takin rawngbawltute chuan an tum chu an thulhsan ta zawk a ni.

Bernard Stubbs-a chuan thil thui hi nuam a ti em em a. Rilru lamah hnufual hle mah se, a kut a themthiam em em thung a. A bik takin 'Khawchhak Thifang' lian tak tak thil kawp a, thi leh banbun siam hi a tuipui hle a ni. A thil siam tea inchei vel thinin, darthlalang hmaah rei tak tak a inen thin a. A hlimthla chuan a tilawm em em thin a ni.

Tho thla pawh thlawn leh an thenawmte zawhte mei hal tuma um te pawh hi a hlimpui thin hle a. Hun eng emaw chang te hian a 'f-f-fel' avangin a nu chu 'mawi mawi' tiin, a thi siam eng emaw ber a pe thin a. Chutiang hunah chuan, a fapa hmuh phaka a awm chhung, ni eng emaw zah chhung chu a nu chuan, loh theih loha a awrh a ngai thin a ni. A awrh loh vaih chuan khap daih rual lohin a thin a rim ang a, intihbuai pawh a cho hial thin a ni.

Hringnun hi Bernard-a chhungte tan chuan a khirh thin hle!

A englam zawnga thlir chuan, a kut themthiamna chuan hun rei tak chhung tleitir theih chang a nei a. An pangpar huana chawngzawng leh vate khawi ngam sa te paw'n a

kut an tawrh tlem phahin, an nghawng thuaibun a tum thinna tam tak lakah zalenna an neih phah thin a ni.

A piancham vawi riatna a lo inherchhuah ni chuan chawchhun atan lui sangha pek a ni a. A vawikhatna atan sangha pum chu a thlengah suah sakin, sangha ruh chu ama then thiam ang anga ti turin an dah a. Tun hma zawng chuan ngun taka an then faisak hnuah a ti chauh an pe thin a ni. Chokaa luh mai mai an rem tihsak loh avangin – a nuin a intihnat palh a hlau si a – sangha hi a pumin a la hmu ngai lo hrim hrim a ni. Sangha chuan a tihlim ta em em mai a. "Tangha! Tangha!" tiin a zai a. "Mawi e tangha!"

"Nia, bawihthe," a nuin a lo ti a. "Ei zo vek rawh aw."

"Miht. Miht!" hlim tak maiin a ti zel a. "Miht duhawm. Tangha miht. Tangha miht. Mawi mawi."

"Sangha mit mawi," aw nem takin a nu chuan a lo tihpui ve zel a.

A rilru zawng zawng pein Bernard-a chuan sangha chu ngawi rengin a ei ta a. A thiam ang angin a ruh te chu a thian ve zel a, mahse a eina thleng leh a vel chu a tiberh vek thung a. A nu leh pa chuan hai der an tum nasa em em a. An theihtawp chhuahin, phurpui hmel takin an nuih sen sen a – an fapa paincham a ni miao si a. Chaw ei kham hun a nih ve leh chuan, a pa chu lawm takin, an huana hnim to vat fai turin a chhuak nghal a. A nu pawhin, lawm takin, chaw eina chu a seng fel nghal thuai thuai a. A hmaiah sangha, zikhlum leh ice-cream kai luaiin Bernard-a chu, zel ang maia awmin, a thutnaah chuan a thu reng a.

Phone a lo ri a. Chhang turin Pi Stubbs-i chu a va kal a. Chaw ei dawhkan chhuk sanin Bernard-a chu ngaihtuahna muk tak nen a chhuak ve ta a.

“Teh reng mai!” a chhungte chuan an ti rual thawt a.

“Mi eng zat nge awm ang?” tiin Bernard-a chuan a zawt leh a.

“Mi 34 vel an nih ka ring,” a nu chuan phur takin a lo ti leh a.

“Miht an nei ang em?” tiin Bernard-a chuan a zawt leh a.

“Teh reng mai.”

Hlim takin Bernard-a chu a nui a.

A lang a pauah chuan hmin fel dera an inhriat avangin a nu leh pa te chu an thaw huai a.

Buaina sawi tham pakhat mah awm loin kum hnih chu a liam ta mai a.

Enkawlna In lamah pawh Bernard-a chu a fel hle a. A nu leh pa te pawh inthiam lo lutuk lem lo takin, a awm loh chhung ni te chu am takin an lo chen ve a. Bernard-a nungchang chu a that em avangin ‘enchhinna atan’ tiin an In lamah chawlhkar tawp chhung haw an phalsak nghe nghe a. In a lo thlen hmain a nu chuan lungphu tha lo a lo nei hman a, a pa pawhin namen lohin zu a in phah baw a.

Hemi hun atan bik liau liau hian Bernard-a chuan Suit pawl a ha a, maimaw puansin tle chia siam nghawngawrh hring a awrh baw a. A lu lianpuiah chuan a sam a khuhi pial thlarh a. A dangaw k tawng pawh a chiang em em tawh a. A zanriah bik te atan sangha a ei chak thu a sawi a. An In hlui leh a chhungte a hmuh chuan a hlim hmel hle a. Chaw ei hun hma chuan a pindan hluiah an hruai chho a. A thi hlui eng emaw zah a han hmuh te chu an chawei chhung zawng chuan nghet takin a nghawngah a awrh reng a, a nu chu pakhat te mah pek tumna a nei lo a.

Ngawi rengin chaw an ei a, a

chhungte mak tih khawpin hma takah mutmu a tuah baw a. Rilru hah luat avangin a chhungte pawh an mu ve thuai a.

Zanlai a pelh hnu chuan Bernard-a chu an thlam kailawn hmalamah a baw vak thla a. Huana an bukte sakah chuan a lut a. Chu ta hachhek awm chu la-in a nu leh pa te chu a chek hlum a. Thei leh thei loin, an thenawmte Inah a va kal leh a, an thenawmte nupa leh an zawhte chu a that baw a.

Police an lo thlen meuh chuan, an Inpui chhuatlaiah hahdam tak maia lo thuin, inchhung hotunu ber tan thi mawi – mihring mit pariat, sangha mit paruk, zawhte mit pahnih leh inchawih taka rem thifang rawng chi hrang hrang hmangin a lo thil mek a ni.

Tlai dar 3:30-ah, khawchhak thifang leh sangha mita siam, banbun tawi nalh tak mai a peih fel chu, “Duh-duh-duhawm. Tangha miht duhawm. Mawi mawi,” tih pahin Bernard-a chuan a nu a pe a. “I t-t-ta tul, a-a-anu.”

Rap titih deuh si hian, “A va mawi ve,” Pi Stubbs-i chuan a ti hlui a. “Ka lawm lutuk, mate. I va’n fel em.” Lungawi lo takin ni hnih chhung zet, zahngaihna namen lo nen, sangha mit te an tawih ral thlengin a bun hram hram a.

Chumi ni atang chuan mit hian Bernard-a rilru an la ta em em mai a. Ama mit ngei pawh darthlangah a en vung vung zel a. A chhungte mit te, huana sava mit te, thenawmte zawhte rethei tak mit te, an chenna In mual zawla bawng tla te mit te, khawlaia mikhual kal te mit te. A bik takin, a nuin chawhmeh leina hmuna a hruai changa, sangha zawrhna hmuna sangha thi tawh te mit te.

A lo upat deuh hnu chuan, a thinur sosang hi a hlauhawm thin em avangin, a chhungte chuan khawtlang rawngbawltute chu an pun leh ta nge nge a. A thinrim a chhuah chuan chak namen lohin a chak a. A taksa chuan hmasawn lam pan loin; a ke pawh la bai mah se, hetiang hunah hi chuan, a Pa pawhin a thunun zo tawh thin lo fo a ni. Kum sawmparuk a tlin hnu phei chuan a naupan lai ai khan hmuh a hreawm tawh fe zawk a.

Tanpui tura lo kal, rawngbawltunu chu a lawm em em mai a. “Kan bulah a hlim fe zawk ang,” a ti a. “Enkawlna dan kan thiam alawm. Kan hnathawkte an inpek bakah, a anpui mipa dang tam tak zingah a khawsa dawn alawm.”

Bernard-a nu leh pa te chuan mak tih hmel takin an inen a.


Bernarda’n ‘Enkawlna In’ a luh hma ni zawng chu buaina hlirin a khat deuh ber a. A tirah chuan hnial namen lohin an remruatna chu a hnial a. Tlema boruak a daih deuh hnu chuan a nuin a hmabak nawm dan tur zia te a hrilh fiah a. Rawngbawltu sawi ang chiah khan, “I anpui midang tam tak an awm ve dawn alawm,” a ti a. Thinlung zawng zawngin a pa chuan, “Sikul ang reng ve deuh a nia, Mama. Mipa reng reng chu sikul an kal vek alawm. I hriat kha.” Muk taka inngaihtuahin Bernard-a chuan a chhungte chu a en vung vung a, “Thil siam min phal sak ang em?” a ti a.



MOVIE REVIEW

-stanley

A WALK TO REMEMBER (2002)



Tlangval tirh chhas leh star uar vel laia hmangaihna runpuia min tluk luhtirtu leh nula leh tlangval inkara hmangaihna tak min hriattirtu 'A Walk to Remember' - Mandy Moore leh Shane West - channa hi mittui nen a hunlai chuan ka ennawn tluk tluk thin kha a ni a. A hunlai chuan khatiang anga hmangaih tur chhas te pawh min zawntir viau reng a ni. A movie hian nula leh tlangval inkara hmangaihna a tihpun zel theih ka ring tlat zel a. La en ve lo tan phei chuan chhas te nena en dun ngei atan ka duhsak viau che u a ni. A film Original Sound Track (OST) - Only Hope, Switchfoot hla - a changtunu Mandy Moore ngei maiin a'n sa raih lai te kha a film ngaihno beina tizualtu niin, rilru leh thinglung chhungril taka nalh in tih ve ngei ka ring! Film hlui leh ril, tunlai nula leh tlangval te tana en tur leh puitlinna kawnga hruiatu atan he 'Romantic Comedy/Tragedy' hi en ve ngei turin duhsakna ka hlan tak meuh meuh che u a ni.



FORREST GUMP (1994)



Forrest Gump hi Tom Hanks channa film ropui zinga chhiar hmai hauh loh chi a ni a. Ka en hmasak ber erawh chuan ho ka tiin, nuih chang a awm a, nin chang a awm a; ka naupan lai a nih vang te pawh a ni ang. Mahse, ka lo puitlin ve hnu leh thil chinchang ka han hriat ve deuh hnua kan ennawn leh hian ril ka tiin, mittui nen ka en ta fo mai! Wawi sawm chuang en chhuak tawh mah ila, mittui nen ka la en ziah hi chu mak ka ti! A film siamtu, Robert Zemeckis (Director) hian a lo siam ropuizia hi ka fak lo thei lo. Film ril leh kaihnawih tam tak nei a ni a. Entirna'n Emojis kan tih, tunlaia Emojis tel loa message type thei leh thawh thiam tawh lo tan chuan a rawn chawr chhuahna ni awm tak te pawh kan khaihkhin thei ang chu! A film hi nun kaihruiatu atan rintlak ka ti a. A changtupa rinawmzia leh mawlzia ti mai ang, chumi chung pawha mi nun tluang tak leh rilru tha tak a nihna te hian hnuk a tiulh nasa leh zual a ni. A hun laia AIDS leh HIV natna te pawh mipui vantlang hriat theih tura rawn pho chhuaktu tha tak a nihzia min hriat nawn tir fo a ni. Thangthar la en lo te tan in en ve ngei a, in ngainat ve ngei ka beisei. Nuihna leh thahna a tamin, nun chhungril khawih tak film a ni.



AS ON WEEKEND SEP 1- SEP 3

TOP BOX OFFICE


1. The Hitman's Bodyguard
\$10.5 M



2. Annabelle: Creation
\$7.5M




3. Leap!
\$4.7M



4. Wind River
\$4.6M



5. Logan Lucky
\$4.2M



6. Dunkirk
\$3.9M



UPCOMING MIZO FILM : SCOOTY


Khaikhawmna: Thingtlang nula pakhatin scooty a nei thar ve a. Khalh a zir atanga an buai chhoh dan leh an chungkaw member dang, a unaute leh a nu thlengin khalh ve chakna thinlung an neih avanga chungkaw buaidan vel a ni.

Film Plans: **September ni 16**, Saturday, chhun dar 12:00-ah, Millennium Center kawtah Trailer leh OST release a ni dawn a. **October ni 10**, Tuesday zan hian a film release a ni ang. Release-na hmun tur hi Vanapa Hall hnuai Hawla Auditorium-ah ni ang.

Easter Egg: For the first time, item song (*number*) telh a ni dawn a. Bollywood style-a ennawm tham a ni ang.

Behbawm: OST satu - Dji & Solomon. Produced & Written by PC Mawia. Directed by Mapuia Chongthu.

Genre: Rom-Com.



Q&A WITH OUR CG

angaihi

Name: **Lalmangaihi.**
Height: **173 Cms.**
D.O.B.: **12th August, 2001**
Hobbies: **Sketching, Watching Anime,
Listening Music, Make-up.**
Role Model: **Angelina Jolie.**

MC: A hmasa berin Andrea, Movie Corner Magazine hmingin chibai kan buk a che. Tunlai i dam tha a maw?

Angaihi: Pathian zarah ka dam lai tak a ni e.

MC: Hei, Cover Girl-ah i han tang ta rup mai a. Hetiang hi i lo ti tawh ngai em??

Angaihi: Tun hi ka vawi khat tihna.

MC: Tunah hian khawi school/college-ah nge i kal?

Angaihi: Mount Carmel School, Chaltlangah Class XI ka zir mek.

MC: Modelling hi i tuina lam a ni em? Eng nge i aim in life?

Angaihi: Aw, tui ve e. Part time atan a tha ka ti em em bawk. Ka aim in life chu Doctor.



MC: Instagram-ah hian followers i nei nual mai a. Mi tam takin hriat chian che an chak a. I nu leh pa te hming min hrilh thei em? Unau eng zat nge in nih a, a upa lam nge naupang lam i nih?

Angaihi: Ka pa hming chu J Lalrinlana a ni a. Ka nu hming chu R. Lalhminghluni a ni. Kan unau hi pali kan ni a, a upa ber ka ni.

MC: Zawhna dangah han lut kawi ta ila mawms, i single em?©Tlangval tam takin an hre chak lutuk a...

Angaihi: Hahaaa ☺☺☺ Zirlai mai ka la ni e.

MC: A nih, hmangaihna i thlirdan min hrilh thei em?

Angaihi: Hmangaihna hian thil tih theihna chak tak a nei a. Kawng tha leh tha loa min hruai theitu a ni bawk.

MC: Tu nge khawvelah i ngaisan ber? A chhan leh vang?

Angaihi: Ngaihsan hi chu ka nei nual a mahse tuna ka sawi lan duh ber chu Angelina Jolie hi a ni. Ani hi mi retheite tanpuina lamah a thawhhlawk em em a. A hmelthain a fing hle a. Hnam hrang hrang ami fahrah te fa-ah lain, hnam hrang hrang te hi ang khat kan nihzia a lantir a. A fate tana a inpekna hi fakawm ka ti a ni.

MC: He khawvelah hian i duhthusam pakhat hlawhtling thei ta se, eng nge i thlan ang?

Angaihi: Doctor thiam tak leh tha tak nih a, mi harsa leh changhai zawk te theih tawp chhuahsak a enkawl theih hi ka duhthusam leh hlawhtling tura ka duh chu a ni.

MC: Tunge i celebrity crush?

Angaihi: Justin Bieber.

MC: Music hi eng genre nge i ngaihlak thin? Chuan, i hla duh zual pathum min hrilh thei em?

Angaihi: Ka ngaithla kual vek a; from alternative music to E.D.M, mahse Rock music hi ka ngaina em em lo. Ka hla duh zual bik pathum te chu:
Aerosmith - I Don't Wanna Miss A Thing.

The Beatles - Let It Be.

Tatiana Manaois – Helplessly.



MAKE-UP **andrea**
WARDROBE **siamsiami design studio**

MC: Movie te hi I ngaina em? Eng nge hmuhdawm i tih ber?

Angaihi: Ngaina em em lo mahse hunawl ka neih changin ka en ve thin. 'Miracles in Heaven' hi hmuhdawm ka ti a. Zirtir a nei tha ka ti hle baw.

MC: Zawhna tawp lamah lo kai dawn hnai ila; a khamawm loh khawp mai, nilenga kawm che kan chak mahse hun i nei reng bik si lo. Movie Corner Magazine hi eng nge i ngaihdan?

Angaihi: Hetianga online magazine changtluk tak mai kan nei hi a bengvar thlak hle ka ti a. Social media-ah, a bikin Mizote tana hmasawna rahbi pawimawh tak pakhat niin ka hria. Hei aia hma insawn leh zel theihna'n duhsakna ka hlan baw a che u.

MC: I fans leh followers te hnena thuchah duh i nei em?

Angaihi: Engtiklai paw'n min seltute hi chu an awm reng dawn, khawvel kalphung a ni miao a. Mahse min sawina dik lo tak te chu tawrhchhel zirna'n hmangin, kan thil tihna kawng engkimah a tha zawnga hmasawn zel i tum theuh ang u. Chuanin, Mizo Online Magazine hmasa ber 'Movie Corner Magazine' hi lo chhiar ula, an website <http://moviecornermagazine.com/> te lo tlawh ve turin ka chah duh baw che u a ni.

MC: I hun hlu tak min pek avangin Movie Corner Magazine chuan i chungah lawmthu kan sawi e.

Angaihi: Kei pawh in magazine Gover Girl atan min hman avangin ka lawm em em e.



STYLISTS **esther rokhum,
zamtei ralte,
ruati hrahse**

PHOTOGRAPHY **didini tohhawng**

VIDEOGRAPHY **andrew ralte**



Siamsiami hi tuna kan CoverGirl thawmhnaw design tu hi a ni.

SIAMSIAMI

DESIGN STUDIO

MC: A hmasa berin, eng vanga Designing lama kal nge i nih a? Designer nih i duhna chhan min hrilh thei em?

Siamsiami: Ka naupan lai aṭanga nih ka chak ve em em ṭhin a ni a. Barbie kawr ṭhui te hi nuam ka ti em em ṭhin; ka nu hian min tuipui baw a. Class XII ka pass hnu khan Diploma Course, NEIFT, Guwahati-ah ka zir zo a. Chuan, Degree Course in Fashion Design kha INIFD, Chandigarh-ah ka zir zo leh a ni.

MC: I thil design te hian hawi lam bik an nei em? I design hian background a nei em? Thawnthu te a lo inphumru ṭun maithei a, chu'ng techu min hrilh thei em?

Siamsiami: Lines (*Straight, Curved, Wavy, Zigzag, Dotted, Diagonal*) lampangah hian ka kal deuh a. A hmun leh hun a zir teleh ka rilrua a lo luhdan te'n an hril ṭhin. Entirna'n, tuna magazine cover tur bika ka design te hi 'Boho' inspired an ni a. Kan theme 'street style' nen pawh hian a inmilin ka hria. Chuan, refurbished clothing show ka tum mek baw.

MC: Hna i thawhdan te min hrilh thei em? Creativity lam te emaw, thawhrim bur emaw te ang chi te hi eng nge i ngaihdan? Mimala thawk chi nge i nih a nih a, midang te nena sawi ho ang chi i nih?

Siamsiami: Zarkawt Eros Tailoring bulah sawn' *dawr ka nei ve a*; a hma khan rei lo te chu VSE, Chaltlang-ah part time-in ka thawk tel baw ṭhin a. Mahse, ka dawrah hian in-concentrate ka duh avangin ka bansan ta a. Designer ṭha leh rintlak ni tur chuan creativity mai bakah thawhrimna hi pawimawh ka ti. Aw! Mimalin ka thawk a, team work chu a awm rih lo.

MC: A nih chuan, hun khirh tak tak tepawh i lo paltlang tawh ang tih a hriat mai a. Chutiang hunah chuan pressure te pawh a sang viau mai thei. Engin nge chutiang hunah chuan khalh kal ber ṭhin che?

Siamsiami: Hun khirh tak tak paltlang tur hi a tam ve khawp mai. Hetiang hunah chuan ka ṭawngṭai tawp bakah ka nu hi karawn nasa ṭhin a. Hei hi min khalh kaltu ber chu a niin ka hria.

MC: Mimal bikin project eng emaw ti turin an sawm tawh che em? A tlangpui min hrilh thei em (*Inneih, festivals, public meeting etc.*)?

Siamsiami: Mimal bika sawmna chu la tawng chiah lo. 2016 Youth Icon 'Mami' kha Top 10 aṭanga a hak tur kha kan buaipui ve a ni mai.

MC: A nih leh, i project te, client-in an duh loh emaw an beisei loh emaw anga thil thleng te a awm tawh em? Chutiang hunah chuan eng tin nge nangma'n i lo dawnawn ṭhin?

Siamsiami: Pathian zarah client tawh khirh deuh ang hi chu kan la tawng vak lo.

MC: I hna thawh tawhah eng project nge i chhuan ber? Han ngaihtuah zui rauh rauh emaw, sawi kham theih miah loh emaw te i nei em?

Siamsiami: Aw! Nei ve e. INIFD a kan Final Show-ah khan ka ṭhiannu nen 'Puan Ropui' theme hmangin kan show a. Kha kha ka chhuang ve!! A harsa baw a, kan hahpui em em baw.

MC: A nih leh, design ṭha kan han tih tak mai hi eng nge nia i hriatdan min hrilh thei em?

Siamsiami: Trend (*design thar ber ber*) follow ve zung zung a ngai; hralh kal tur leh mi duh tur chuan. Chu tih rualin, keima mimal ngaihdanah chuan, trend follow chu a ni ber lo a. Thawmhnaw man to chauh hak tepawh a niin ka hre lo. La khawm thiam te, chawhpawlh thiam te, mahni style fel, fai tak neih, mak dangdai ringawt ni chuang si lo, chawhchawrawi kual thiam hi ni berin ka hria.

MC: I hma lam hunah hmasawn zel dan tur kawng chhawp i neiin a rinawm a. Sawi paw i tih loh chuan min hrilh thei ang em?

Siamsiami: Aw. Ka dawr hi tun aia tihchangtlun zel tumin ka bei ve mek a ni.

Follow Siamsiami on instagram:
<https://www.instagram.com/siamsiami19/>

MC MAKEUP Tips & Tricks

-andrea


Make-up hi kan nitin nuna pawimawh em em a ni a. Tunlaiah phei chuan, a hmei a pa pawhin kan hman vek tawh a. A hman ro roah, a thiam leh thiam lo inkar a hriat theih hle bawh a ni. Kan inchei nalh duh nikhuuaa make-up inhnawih dan tur tlem han tarlang teh ang.

1. Foundation:

Hmai kan pihh fai zawh hnuah moisturizer leh face primer hman phawt ila. Face primer hian foundation rual lo palh tur te vengin, a tinghet a ni; face primer kan nei lo a nih chuan moisturizer chauh hman pawh hi a paw chuah lo. Foundation kan lei dawn hian fimkhur hle a ngai a. Kan vun rawng aia shade khat vela eng hi lei tur a ni. Tin, a rawng hi kan kuta en chhin mai loin, kan khabe ruh a tngin kan nghawng thleng han tat thla ila, kan vun rawng nena inchawhpawlh (*blend*) mawi tawh tur kha thlan tur a ni. Kan vun dang nena a in var hleih lutuk emaw, a in duk hleih lutuk emaw chuan a lang nalh lo thei a, kan lang beh hma thin a ni.

2. Concealer

Foundation kan hnawih hnu hian concealer hi kan mit hnuai (*under eye*) leh biang ruh/ki (*cheek bone*) leh kan hnar ngul (*nose bridge*)-ah te kan hnawih leh ang a; hei hi makeup blender sponge emaw brush emawin chul mam leh tur a ni. Mit hnuai duk (*dark circle*) leh hmai duk nei tan chuan concealer hi foundation kan hnawih hman hnawih lawk tur a ni. Concealer hi kan vun rawng nena inmil si, mahse kan foundation aia tlema eng hret hman tur a ni. Tin, hnawih tam lutuk chuan kan hmai a tikhir phut (*cakey*) thei bawh a ni.




3. Eyebrow

Kan mithmul (*eyebrow*) ruangam (*shape*) kan tihfiah hma hian eyebrow brush-a khuhi phawtin a tilang nalh duh zawk a. A tlangpuiin kan eyebrow hi rawng uk duk (*dark brown*) lama kan line fiah hian a lang nalh duh zawk a ni. Sam buang lampang neih phei chuan a uk duk lutuk lo (*medium brown*) hman hian a lang nalh duh zawk thin. Eyebrow hnawih dawn hian angled brush hman a tha a. Tum khatah rawng hnawih tawh loin, eyebrow in tanna lamah tlem tein rawng chu han hnawih ila, tichuan a intahtawhlin a tak chho zel tur a ni.

4. Eyeshadow

Eyeshadow inhnawih hma hian mit tlangkawm leh a bawr velah primer emaw concealer emaw hman thin ila; hei hian mit duk bik lai te a hliahkhuh tur a ni. Kan mit tlangkawm inthlehna (*eye crease*) bawr velah rawng eng (*light colour*) lam kan hnawih hmasa anga, tichuan rawng tak leh dum lam kan hnawih thla tur a ni. Tin, kan kawr hak rawng ang chiah inhnawih hi a hun leh hmun azirin a lang



Pic: Andrea (Kan CG MakeUp Artist)

nalh vek kher lo thin a ni. Eyeshadow kan hnawih zawh vek hnuah eyeliner hi hnawih leh tur a ni.

5. Contour:

Kan hmai han tihlan fiah leh hriam deuh na'n hian contour hi hman thin a nia; hmai mawm tan chuan contour powder hman tur a ni a, hmai ro lam tan chuan contour cream hman zawk tur a ni. Tin, a pahniha hman kawp hi a tha lo a, hmai a lang khir phut (*cakey*) thei a ni. Contour rawng hi kan foundation aia shade hnih (2) vela duk hman tur a ni. Kan biang ki (*cheekbone*) hnuaiah kan hnawih ang a, a chho zawngin makeup blender hmangin kan chul mam tur a ni. Hemi hnu hian kan biangki-ah blusher kan hnawih leh ang a, hei pawh hi a chho zawng bawka hnawih tur a ni. Blusher hi tih luat a awm theih avangin a tirah tlemte hnawih phawt hnua hnawih belh leh mai tur a ni. Highlighter kan nei a nih chuan a tawp berah kan blusher hnawihna chung deuh hlekah tlemte hnawih leh tur a ni.

PS: Andrea hi Facebook leh Instagram ah Andrea lang 1 & andrea_lang_1 tih hmingin a follow theih a ni.

2010 HNU LAMA HOLLYWOOD MOVIE MUSICALS EN TLAK ZUAL TE

-omoma ralte


1. BURLESQUE (2010)



Khawvel pum hriata hmeichhe zai thiam pahnih, Cher leh Christina Aguilera te Musical Film channa hmasa ber a ni a. Christina Aguilera hian a changtunu ber 'Ali Rose' role a chang a. Cher hian Burlesque Club neitunu ber 'Tess' role a chang a ni. Thawnthu ngaihnaawm pangngai tak ni thei turah screenplay lam writing lam uluk tawh loh vang nge, duhthusam lohna lai a awm nual a! Mahse, he film-a hmeichhe hmelfha, zaithiam

bawk si, nalh leh sexy taka an zai a, an lam han hmuh chuan, a storyline tih vel chu a ngaihdam theih khawp mai.

2. GLEE 3D (2011)



Glee TV Series en thin chuan kan en deuh vek awm e. Concert Documentary angin he film hi kalpui a ni a. A changtute pawh a actor ang ni loin, an character chan ang te vekin an rawn la lang a ni. Stage performance tha tak tak hmuh leh ngaihthlak tur a awm bakah, backstage lam footage leh audience lam kawmna te pawh a awm nual a ni.

3. LES MISERABLES (2012)



Film en hrehawm bawk si, hmuhnaawm bawk si an tih ang hi a ni thei mai awm e. Victor Hugo novel ziah bechhana siam a ni. A 'Broadway Musical' version pawh a awm hmasa tawh a ni. A changtute an tha a, screenplay writer-te an tha bawk nen, musical movie en tlak tak a ni e. A stage musical ami zawk hla tam tak a tel bakah, hla dang pawh belh a ni a. Movie Musical ngaina mi tan chuan en ngei chi a ni.


4. ROCK OF AGES (2012)



Hei pawh 'Broadway Musical' movie-a an siam tho a ni a. Tom Cruise, Catherine Zeta Jones, Alec Baldwin, Mary J Blige leh mi lar dang tam tak an chang a ni. He movie-a hla an hman te chu 80's hunlaia 'Glam Rock Era' hla te kha an ni tlangpui a. Def Leppard, Journey, Guns 'n' Roses, Bon Jovi, Scorpions leh band dang, Mizote'na kan hriat lar tur hla an hmang nasa khawp mai. Hei pawh hi a storyline pui viau lo mah se, a changtute

performance a hmuhnaawm bakah, Mizote hla hriat ve zawng a tam avangin en ngei chi a ni.

5. THE DEVIL'S CARNIVAL (2012)



Hemi list-a movie dang te angin budget sang taka siam ni ve lo mah se, a dangdaiin, a hmuhnawm khawp mai. A changtute ber chu mi pathum, John, Tamara leh Ms Merrywood te an ni a. Hremhmunah tla-in, Setana Carnival siama thil hran hran an tawn chungchang a ni ber a. 'Horror Musical' niin, an zai leh lam pawh chutiang lam hawi deuh chu a ni. Darkar khat pawh a tlin loh avangin 'short-movie' tia sawi theih a ni mah ang chu!

6. FROZEN (2013)



Sawi tam ngai loin, hei chu kan hre vek awm e. Disney siam niin, he 'Animated Muscial' hi unau pahnih Elsa leh Anna te thawnthu a ni. Elsa chuan a tum vang reng ni loin, an khua chu khawvawt lutuk ni reng turin, a power hmangin a dawi palh a, a tlan bo zui ta nghal a. Elsa zawng chhuak a, a dawi chu titawp turin, a unaunu Anna chu a kal chhuak ve leh ta a ni. He film-ah hian hla nalh tak tak

a tam a. 'Let it go' ngat phei chu Mizo naupang zingah sa thiam lo an awm awm lo e.

7. INTO THE WOODS (2014)



He film pawh hi 'Broadway Musical' adaptation tho a ni a. "He film atang hian mi tam zawkin James Corden kan hriat lar tanna a ni e," ti ila kan sawi sual tampui awm lo e. Dawithiam pitar pakhatin fa nei thei lo nupa hnenah fa an neih theihna'n tihtur a pe a. Chumi an tih pah chuan Red Riding Hood, Cinderella, Jack (Jack and the Beanstalk thawnthu ami), Rapunzel leh midang te an tawng ta a ni.

8. MOANA (2016)



He list-a Disney animated musical pahnihna, Moana leh Dr. Strange kha ni khatah a indawtin ka en a; Moana hi hmuhnawm ka'n tih zawk tlat chu! A title character Moana hi Motonui khua lal fanu neih chhun a ni a. Maui a'n lungflu pakhat 'Heart of Tafari' a ruk avangin Moana te khuaah chuan harsatna chi hrang hrang a thlang a. Chu harsatna chu a tawp theihna'n 'Heart of Tafari' chu a awmna tur dik takah dah let leh a ngai a. Moana chuan Maui chu va zawngin, dah let tir turin a chhuak ta a ni. Maui atan hian 'The Rock-a' aw an hmang a,

a zai lai part pawh amah ngeiin a sa ve vek nghe nghe a ni.


9. LA LA LAND (2016)



Ryan Gosling leh Emma Stone te hi chu an inhmeh dun ngang a ni ang e. La La Land hi an film chan dun pathumna a ni tawh a. Hetah pawh hian inhmeh dun leh em emin, an performance pawh a hmuhnawm khawp mai. Ryan Gosling hi Jazz pianist, Sebastian angah changin, Emma Stone hi lemchan khawvela hlawhtlinna zawng mek, Mia lemah a chang a ni. Sebastian leh Mia intawn dan leh an inngaihawm chhoh zel dan chanchin a ni deuh mai a.

A story chu a dangdaiin, a bawn em em lo a, mahse an zai leh lam vel te hian a tihmuhnawm em em a ni.

10. BEAUTY AND THE BEAST (2017)



Kum 1991 cartoon 'Beauty and The Beast' kha live action-in an rawn siam tha leh a ni ber ang chu. A thawnthu kal dan leh character-te pawh an inang deuh thlap a ni. A changtunu ber, Belle atan Emma Watson a chang a, Beast-ah Dan Stevens a chang baw a ni. Hemi te pahnih bakah hian Emma Thompson, Ian McKellan, Ewan McGregor, Kevin Kline leh lemchan khawvela milar dang tam tak te pawh an chang a ni. Kum 1991 'Beauty and The Beast' en tawh tan pawh a hmuhnawm anga, la en lo tan pawh a hmuhnawm tho baw ang. "Beauty and The Beast" tih

hla, a cartoon atanga rawn lar pawh kha he film-ah hian an sa ve a ni.

ZAMTEI NEN

MOVIE AND CHILL

-able awmtea

Fur lai tih takah khua chu a cheng duh hle mai. Pawna ruah sur mekin tukverh a theh rik that that thawm karah chuan ral khata ui bauh lauh lauh te chu a hriat theih bawk a. Khum dup lum nuam takah chuan thatchhe taka thu mu chungin laptop chu a rawn pawt hnai a. Movie hlimawm lam leh nuihna tur deuh nia ka rin ka ken te chu a enkual zung zung a.

Ka nakah min rawn nghawk zeuh a. Nuih seih pahin, “Min va ngaihsak lo tak, min kawm hlim turin i lo kal ve a, i rilru ringawt i kawm mai. Eng ber hi nge kan en ang ka tih chu?” a tih chuan min lo be reng a ni tih ka hrethiam ve chauh a. Inthiam lo taka nuih let pahin, “I duh ber kha ni mai, a hmuhnawm vek ang ka ring i bulah te chuan...” tih pahin ka han nghawk let ve sak a.

Ni e, ngaihtuah loh a har ve bawk em a ni. Unau zinga a naupang ber han nih hi chuan mi ngaihah nula tlangval

uaih tawh mah i la, chhungte bulah chuan naute ang kan la ni tlat a; an naute kan nih miao avangin duat pawh min duat thin a nih hi. Chhungte’n mi an duat na na na chuan han pangchan rei deuh te pawh a awm lo chuang lo e.

Zamtei hmel duhawm em em chu ka en a, hlim luih a tum tih ka hai lo. A kawr hmaa hawrawppui lian taka “PEACE” tih inziak leh a nun te chuan inkungkaihna eng mah a nei rih lo a. A mitmeng chhungril takah chuan khawharna a khat, mi thlabar ka hmu tlat a ni. Hnem tumin thil chi hrang hrang tihpui thin mah i la, a khawharna chu ka chhawk zo lo a, a ngaihtuahna pawh ka la peng hlei thei lo thin. Ka bulah chuan hlim anga lan tum thin mah se la a ruka a mittui hru lai ka hmuh fo avangin chhel takin a tuar mai ni ber zawkin ka hria.

Tleirawl mahniah lehkha zir hrang rual a nih ve tawh hnuah, phai ram hla takah a awm pawha pangchang taka a biak thin a nu kha a ngai em em thin a. Foreign ram hrang hranga a pa hnathawh vang tea an nupaa zin bo a ngaih pawhin an inbe reng thin. Pangchang tak leh duat takin an inenkawl tawn a, thin ang maia inkawm ngeih an nih avangin Zamtei hian thin ngah viau e ti lo hian a nu hi a ngai em em reng thin a ni.

Kum 2017 kan chuangkai a. Hlim leh lawmin mi tin mai hma thar nen kan che suau suau a. Zamtei nu chu insawiselna eng emaw neuh neuh avangin an inentir a. Test chi hrang hrang an han neih hnu chuan result duhawm lo tak a nei ta tlat mai. Damdawi In tha ber berah te an kal kual a, an theih tawp chu an chhuah ve reng bawk a. Damdawi Inah te hian a nu khum kiangah Zamtei chu a tal chawt a. A nu pawh hian Zamtei enkawl chu nuam a tiin, a duh bik deuh reng a ni.



Hun a liam a, a nu natna chuan zual lam a pan hret hret a. Phai lamah pawh inenkawl rengin awmzia a awm ta lo niin an ngai ta tlat mai. Mizoram lamah an rawn haw a, mahni In lam atangin treatment an lak chhunzawm reng bawk a. Hun chuan a hrem ni mai hian a hriat a; mi hlim thawm te pawh chu a tan chuan ngaihtlak hrehawm a chang zo ta. A bula khumah chuan a nu na tuarin a mu reng a, chutiang chung chuan a tan hlim ngaihna a awm lo bawk em a ni.

A nu tan chuan engkim a huam a. A kut a hum lum sak a, a lukham a kam sang a, a tihniam leh a. A ke a hmet a, puan lumin a khuh a, a hawng leh a. Theih ni se la, engkim tihsak a duh reng, a lungchhiatthlak lai erawh chu a tih theih a tam tawh si lo chu a ni. Zan a mu lo a, chaw pawh a ei tha thei hek lo. Chuti chung chuan a nu hmuh laiin hlim hmel a pu reng a, chau angin a awm ngai lo; tawngkam nem tak leh hriat nuam takin a be reng bawk a.

May thla a rawn ni chho a. A nu natna zual zel vang chuan 'in lama inenkawl ai chuan' tiin beiseina beidawnthlak tak nen Damdawi Inah bawk an lut leh ta a; tih theih a tam lo ngei mai. Damdawi Inah pawh a awmpui deuh chawt reng a, hah a sawi ngai lo. A nu pawh chu a hniam ve hret hret a. Chun'gte chuan a timangangan, a thin a titawt a, a rilru a tibuai thin.

Theih tawp hian tawp a nei a, Pathian ruat chu kan tihdanglam theih a ni si lo. A ram nuama cheng ve tura chung lamin a lak ni chuan a awm ve lohna khawvel hi a ruak ta vek ni maiin a hria a, an lusunna hnem tura mipui tam tak rawn pungkhawm te chuan an hnem zo si lo. Thuin a chham seng lo a, tahna aw rawl pawhin a daih zo lo. Mittui nena koh kir leh theih ni se la, a lo kir leh ngei ang. Chawlhna nuama kalsantu a nu chu a ngai em em a, a awm ve lohna khawvel hrehawm chu a tan chuan hremhmun a chang zo ta ni berin a hria.

A thluak a chawmawlh a, chaw a ei thei lo a, tui sik tak ngial pawh lem harsa a ti; a hrawkah a tang tlat. He khawvel hi a ruak ta huai mai a, kawla ni rawn chhuak thin te chuan mawina a nei ta lo a, lungngaihna a rawn herchhuahpui ni maiin a hre thin. A natna chhungril taka rum vawng vawng chu thua sawi chhuah thiam chi a ni lo a, kei ngei pawhin hriatthiampui mah i la thua sawi chhuah thiam chi loh chu sawi chhuak loin ka tuarpui ngawt ngawt mai a ni.

A hunawl neih zawng zawng chu a nu khum kiangah a hmang zo a ni deuh ber a; chhun lamah erawh hna pahni thawk kawp a nih avangin hunawl a nei

lo thin hle. Chu tak te pawh chuan inthiam lohna lian tak neih tirin a rilru a kap reng a. A nu tan a hun tam zawk a hlan thei lo te chuan inthiam lohna a neihtir thin ni berin ka hria. Mi theih tawk aia nasain a enkawl a, a duat a ni tih kan hai lo chungin tih theih a tlem em bawk a ni.

Kawm hlim ka tum a, a rilru lak pen dan ka ngaihtuah a. Clip nuihzatthlak te ka hmuh a, fiamthu ka chhiarsak a, chaw tui tak tak ka siam sak a, a eng mah chuan a khawharna a chhawk zo lo tih ka hai lo. Beidawnsan erawh ka tum lo a, eng tikah emaw chuan hlimna leh thlamuanna a la neih ka ring tlat a. A kawr hmaa PEACE pawh chuan a nunah awmze thar a la rawn nei leh ang.

"Hmuhnawm i ti ve lo a mi?" tih thawm chuan ka ngaihtuahna vak vel atang chuan min tiharh zawk a. "Hmuhnawm ti e. Nang, hmuhnawm i ti em?" ka ti var a. "Hmuhnawm i ti lo a nih kha i nui ve bawk si lo, a nuihzatthlak teh reng nen i ngawi char char a. Hawh carrom board pen hrih mai i la," a ti a. A duh ang a nih phawt chuan a hlimna turah ka ngai a, tih hreh ka nei lo. Carrom board pen tur chuan inhnua lamah kan inzui thla leh ta a.

CUISINE

-stanley

Hun a lo kal ta duai mai! Kan issue hnunung ber chhuahna pawh lo rei leh ta! Tun tum MC Cuzine ziah tur pawh hi hriat thiam a har duh khawp mai. Mahse, dan naranin, mipuite tana siam awlsam leh tui bawk si, season mila kan hriat ber kan rawn chhuah leh dawn a ni. Kan ei leh in lo tui zawkna'n leh hma kan sawn zel theihna'n feedback lam ten kan inpui chho zel turah ngai ila. Hriat duh bik nei tan leh zawhna nei tan FB group lamah te inzawh zel theih a ni e.

MAUTUAI LEH VAWKSA (CHINESE STYLE)



Mamawhte:

- Badam Tel fian 2
- Sesami Oil thir fian 2
- Mautuai Tel chanve
- Vawksa Kg 1 (pan te tea chan tur)
- Soyabean Sauce thir fian 4
- Rice Wine Vinegar thir fian 2
- Purun var bawr 1 vel (a len leh tet azirin)
- Purun Sen pum 5 (pan te te a zai)
- Chicken Stock fian 2 (cube chi pawh a pawi lo, Bara Bazar-a nghapih zawrhna len-ah a phut chi a awm)
- Rasawt hmarcha

Siam Dan:

1. Badam tel chu hmui deuhin chhuang la, mautuai chu han kang sar sar la. Minute thum vel i kan hnu, a ro deuh rep hnuah chuan la chhuak la, dah hrang rawh.
2. Tel chhuan sa-ah chuan purun var leh sen chu han kang leh la, rawsawt hmarcha chu thlak tel nghal la. A hmui rim a rawn chhuah chuan vawksa kha thlak la, Soyabean Sauce pawh chu thlak tel nghal rawh. Vawksa a rawng a rawn thim zual deh thapah chuan tui leih la, chumi rual chuan Chicken Stock (*a phut a nih chuan*) fian 2 telh leh la, tui a chim tawk tein i leih dawn a nia. Venegar pawh chu telh zui la.
3. Minute 15 vel han chhuang cher cher la, a tui a kang hnuah chuan rawtuai chu thlak leh la, chawh kual la, rei lo te chhuan chhun zawm la, a zo chu a ni mai.

Note: Venegar telh hi fimkhur a ngaiin, chi leh hmarcha chu mahni duhdan ang zela telh belh a ni mai.

DESSERTS: LAKHUIHTHEI LEH ICE CREAM

Mamawhte:

- Lakhuihthei Lep 1
- Chini Thir Fian 3
- Vanila Ice Cream Scoop 1
- Cashew Nut Mal 6
- Butter Fian 1

Siam Dan:

Chini chu tui nen chhuang tui la. Chumi pah chuan, frying pan-ah hniam te-in butter kha chhuang tui la, lakhuihthei zai lep chu i thlak dawn a nia; chhuan rei a ngai lo. Butter a kai rual hnuah i suan leh nghal ang. Chuan, plate-ah han chhawp chhuak la, chini tui chu i leih dawn a nia. A bulah Vanilla Ice Cream chu scoop khat dah la. Chuan, Cashew Nut chu hmarcha rawtna-ah han rawt sawm sawk la, a chungah i phul leh dawn nia. Tichuan, dessert tui tak i nei a ni mai.



Recipe te hi Tested and Good Taste Approve vek an ni e – Ed Board.

Article
by the
Love Guru



Add Me on Facebook to know love
Profile Name: Love Guruz.
Profile link: <https://www.facebook.com/love.guruz.5>

Dear Readers,

Hun leh ni te liamin, kum sul tam pawh vei mah se nang nena kan inkar hi hmangaihna a awm chung chuan a chhe thei tak tak lo ang. Hmangaihna lalpa hian i mamawhna te phuhrukin Love Highway-a harsatna i tawh te ka lo solve-sak leh dawn che u a ni.

In harsatna te kha kan email: moviecornermagazine@gmail.com ah emaw, kan Instagram: https://www.instagram.com/mcmag_official/-ah emaw in lo drop ang a, duhthusam aia tha leh nalhin ka lo tanpui thin ang che u.

Tun tumah chuan love letter kawng bo ka chhar hi in chhiar loh atan ka duh lo a, a ruken ka rawn hrilh dawn che u a ni. 'Love Letter to Nurse' a nih hmel a, ngun tak leh uluk takin in lo chhiar dawn nia. A thu chu...

Nurse Coreen,

I dam lai a ni em Phone leh Computer changkang tak tak awm tawhna khawvelah hian thaikawi hmang ngeia i hnena thu rawn hrilh che ka duh a, i lo chhiar chhuak hram dawn nia.

Dam lo mangang tak tak, i chhungte pawh ni miah lo hmangaihna nena i enkawl na hi a fakawm ka ti. Kei pawh hi chhungrilah hian ka dam lo a, hmangaihna min enkawl ve thei ang em

Kan ni tin nun buai tak karah hlimna chhe te kan chhar thin te hi a va nuam em. He khawvel sualna tam tak, eirukna te, hlemhlethna te, inbumna te, uirena te, tualthahna te karah hian midang nun chhan turin i thatlai hun zawng i hlan a. Mahni inphatin, chhun leh zan sawi loin i thawk a ni si a.

Kan Lal Isua ngei pawh khan, au chhuak loa i rawngbawl na hi a fakin ka ring a, a lawm em em ang tih ka ring bawka ni. Midangte chuan hlutpui chein lar kher lo mah la ka nunah hian thu ring takin i sawi asin.

Thu tam sawina hun a awm lo, a hmun pawhin a daih ta lo. Nidangah inbiak kan la tum leh thin dawn nia. I rawngbawl na Lalpan malsawm zel che-in, hmangaihna lo pung zel rawh se.

From

Dr. U Manuna HJ

